



SAKSFRAMLEGG

Sakshandsamar: Marianne Soleng	Arkivkode: FE-033
Arkivsaksnr: 22/385	Løpenr: 22/4595
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Kommunestyret	16.06.2022	024/2022

Faste saker

16.06.2022 Kommunestyret:

Handsaming i møtet:

Rådmannen orienterer:

Orientering v/rådmann Ove Sæbø:

- Planlegg gjennomføring av arbeidsmiljøundersøking for tilsette til hausten.
- Ny administrativ organisering med fire kommunalsjefar innført frå 01.06.2022.
- Informasjon om ulike prosessar i organisasjonen, mellom anna økonomirapportering til rådmannen.
- Jannicke Larsen er tilsett som ny brannsjef (for Bergen og samarbeidskommunane Osterøy, Samnanger og Vaksdal).
- NAV Stat ønskjer drøfting med kommunen om NAV sine lokale på kommunehuset, mellom anna om tryggleiken for dei tilsette. Dette vil verta tema på partnarskapsmøte med NAV Stat i august.
- Arbeid knytt til mottak av flyktningar frå Ukraina er ei betydeleg tilleggsoppgåve for NAV Samnanger.
- Svar på spørsmål stilt av Shirin Kvernes Khadoor (Ap) i formannskapet 02.06.2022, om talet på kommunale representantar i samarbeidsutvala (SU) for grunnskulane i kommunen. Det skal etter reglane i opplæringslova vera to kommunale representantar i SU, og rektor skal vera éin av desse. Kommunen sin praksis er i samsvar med dette.

Orientering v/einingsleiar livsmeistring Carolina Mercadal:

- Logoped har vorte innleigd av kommunen si pedagogisk-psykologiske teneste (PPT) i ein periode, grunna sjukefråvær.
- Kommunen sin faste PPT-leiar kjem tilbake frå permisjon i september.
- Høg arbeidsbelastning i barnevernet over tid. Har hatt noko sjukefråvær. Det er no leigd inn ein vikar for ein periode. Dette er den same vikaren som var innleigd også delar av 2021 og i starten av 2022, og som derfor kjenner barneverntenesta i Samnanger godt.
- Utfordringar med kontorlokala til barneverntenesta. Ser fram til ombygging.
- Barneverntenesta får gode tilbakemeldingar.

Orientering v/kommunalsjef helse og omsorg Edith Oma:

- Legevaktsamarbeidet med Bjørnafjorden. Orientering om kommunestyrevedtak i Bjørnafjorden om legevakt i Eikelandssosen i kjernetida. Administrasjonen jobbar med å avklara denne saka. Ny legevaktavtale med Bjørnafjorden må uansett på plass.
- Status for legestillingar. To av legane i kommunen skal ha permisjon frå høvesvis 01.08.2022 og 01.09.2022. Vikariata har vorte lyst ut fleire stader, men det har ikkje meldt seg nokon søkjarar. Det blir no forsøkt å skaffa vikarar via Legeforeininga si legeformidlingsteneste.
- Status for helsesjukepleiarstillingar. Den eine av kommunen sine helsesjukepleiarstillingar er framleis ledig. Ein søkjar vart tilsett i stillinga, men fekk eit anna jobbtilbod og trekte seg før ho starta i stillinga. Stillinga er no lyst ut på nytt.
- Status for mottak av flyktningar frå Ukraina. Kommunen har per no tatt imot 14 flyktningar - 9 vaksne og 5 barn. Tilbakemeldingane frå flyktningane er gode/positive.
- Orientering om arbeidet med eventuell vikarpool i pleie/omsorg og oppvekst. Presentasjon av ulike problemstillingar, refleksjonar, alternative løysingar, utfordringar, m.m.

Orientering v/kommunalsjef samfunnsutvikling Hilde-Lill Våge:

- Status for oppfølging av verbalpunkt frå kommunestyret 02.12.2021 om skilting og ev. kvit stripe på Gjerdsvegen. Punktet er teke inn i trafikksekringsarbeidet til administrasjonen, som også omfattar Nesjavegen og levering i barnehagen der. Tek sikte på å leggja fram sak i formannskapet i september.
- Bubilparkering på Bjørkheim. Oppfølging av spørsmål stilt av Lena Tveit (BI) i formannskapet 02.06.2022. Det aktuelle området ved den kommunale kaien på Bjørkheim er regulert til park og gang- og sykkelveg, ikkje til camping. Det er no sett opp betongblokker som stengjer av delar av kaiområdet, samt sørgjer for tilstrekkeleg avstand mellom bubar som parkerer på kaien. Kommunen har ikkje høve til å ta betalt for bubilparkering på Bjørkheim. Kommunen bør leggja til rette for bubilparkering ein annan stad. Skilt om forbod mot camping vil verta sett opp på Bjørkheim.

Utvalet sitt kvarter:

Spørsmål om referatsak/notat om retting av skrivefeil i vedtak i folkevalde organ i Samnanger
Øyvind Strømmen (MDG) viste til notatet om retting av skrivefeil som låg ved møteinnkallinga, og spurde om dette ville koma opp som sak til politisk handsaming. Ordførar Knut Harald Frøland (BI) orienterte om at det truleg er behov for å få dette opp som sak, saman med nokre andre tema knytt til folkevalde organ.

Taletid i folkevalde organ

Odd Arne Haga (Frp) spurde om det er tenkt på å laga reglar for maksimal taletid i folkevalde organ. Ordførar Knut Harald Frøland (BI) orienterte om at han ikkje har tenkt å ta initiativ til slike reglar, samt at han meiner at kommunestyret i møta sine kan ivareta eventuelle spørsmål om maksimal taletid.

Trafikkkontrollar/politikontrollar

Anja Elisabeth Gjerde Markhus (BI) viste til vedlegg til møteinnkallinga, med kopi av kommunen sitt høyringssvar om betre polititjenester. Ho spurde om det er mogleg å også senda inn ønske om fleire politi-/trafikkkontrollar i Samnanger. Ho viste i samband med dette til at det er mykje råkøyring i Samnanger. Ordførar Knut Harald Frøland (BI) orienterte om at han vil ta dette opp med kommunen sin politikontakt. Han orienterte også om at politimeistereren eller visepolitimeistereren vil møta formannskapet i Samnanger i haust (06.10.2022), og at det då vil vera mogleg å ta opp spørsmål/saker.

Sjukeheimplass for 100-åringar

Solveig Vassenden (BI) viste til at kommunen får fleire innbyggjarar som er 100 år eller eldre. Ho kom med innspel om at kommunen bør innføra ordning med at innbyggjarar på 100-årsdagen sin får

"billett" til sjukeheimplass på Samnangerheimen. Kommunalsjef Edith Oma orienterte om status for sjukeheimplassar/belegget på Samnangerheimen.

Drosjetilbodet i Samnanger

Håvard Tvedterås (Bl) viste til at det på grunn av sjukdom ikkje var drosjetilbod i Samnanger i helga som var. Han spurde kva drosjetilbod innbyggjarane kan forventa i helgane. Ordførar Knut Harald Frøland (Bl) orienterte om at han vil ta dette opp med drosjeselskapet.

Brannstasjon

Håvard Tvedterås (Bl) spurde om status for arbeidet med planlegging av ny brannstasjon eller rehabilitering av den noverande brannstasjonen. Kommunalsjef Hilde-Lill Våge orienterte om status for planleggingsarbeidet, og om at administrasjonen håpar å ha klart eit utkast til løysing i løpet av hausten.

Ny parkeringsplass på Bjørkheim

Gunn Totland Moss (KrF) spurde om kva som er status for den ikkje-ferdigstilte nye parkeringsplassen på Bjørkheim. Ordførar Knut Harald Frøland (Bl) orienterte om at det framleis ikkje er teke avgjerd om kva plassen skal brukast til, men at den ligg der som ei moglegheit, og at det kan vera ulike alternativ til bruk av plassen.

Samrøystes vedtak.

KS- 024/2022 Vedtak:

Orienterings-/referatsaker vert tekne til orientering.

Rådmannen sitt framlegg til vedtak:

- Orienterings-/referatsaker vert tekne til orientering.

Oversikt over faste saker:

Eventuelle merknader til protokoll frå førre møte.

Orienterings-/referatsaker.

Utvalet sitt kvarter.